



Sesida dals

26 d'avust 2021

Communitgà ils

26 d'avust 2021

Protocol nr.

784/2021

Dumonda urgenta da la fracziun da la PS

concernent mesiras areguard il svilup actual da la pandemia

Resposta da la Regenza

Per cumenzar stoi vegnir menziunà ch'i èn cumprovads actualmain uschè blers cas activs en il chantun Grischun sco durant ils dis extremis da l'emprima e da la segunda unda. Quella giada è la Svizra ida en il "lockdown" resp. per part en in "lockdown". La finamira da la Regenza è quella d'evitar in ulteriur lockdown. Il med il pli efficazi è la vaccinaziun. Bundant la mesadad da la populaziun grischuna è vaccinada. I vegn fatg tut per pudair vaccinar vinavant uschè bleras persunas sco pussaivel che vulan sa laschar vaccinar e per pudair far quai en moda uschè simpla sco pussaivel. Per prevegnir ad ina surchargia dals manaschis dals fatgs da sanadad ed en spezial da lur persunal ston tuttina vegnir examinadas ed eventualmain prendidas ulteriuras mesiras.

Tar la dumonda 1: En cunvegrientscha tranter il Departament d'educaziun, cultura e protecziun da l'ambient e l'Uffizi da sanadad è actualmain vegnì lantschà in project da pilot cun apparat da mesiraziun da CO₂. La finamira dal project da pilot è quella da cumprovar il connex tranter la chargia da CO₂ en la stanza da scola ed il dumber da las infecziuns. Quest connex n'è fin ussa anc betg vegnì analisà resp. cumprovà empiricamain per surfatschas grondas. Sch'i gartegia da cumprovar in connex vegni decidì, sch'i duai vegnir recumandà a las scolas d'acquistar tals apparats. Tut las scolas èn vegnidadas e vegnan rendidas attentas a l'effect e cun quai a l'impurtanza da dar regularmain aria. Er da vart da la Confederaziun è questa recumandaziun vegnida communitgada repetidamain per tut ils locals interiors.

Tar la dumonda 2: Actualmain èn vaccinads cumplettaimain 45 % da las persunas da la gruppa da vegliadetgna 20 fin 29 onns, 52 % da la gruppa da vegliadetgna 30 fin 39, tranter 62 e 79 % en las classas da vegliadetgna 40 fin 69 e bundant 90 % en las classas da vegliadetgna sur 70 onns.

Grazia a las experientschas positivas cun las purschidas walk-in vegnan talas gia offridas dals centers da vaccinaziun en tut il chantun. Dapi ils 23 d'avust 2021 circulescha – en las regions – il bus da vaccinaziun ch'è vegnì lantschà en collavuraziun cun AutoDaPosta Grischun. En il bus da vaccinaziun vegnan purschidas gratuitamain e senza preannunzia cussegliaziuns da vaccinaziun e vaccinaziuns cunter il coronavirus. Quai en spezial en quellas regions che n'èn betg en vischinanza directa d'in center da vaccinaziun. Grazia ad in team da vaccinaziun mobil vegn purschida a manaschis ed a scolas ultra da quai la pussaivladad da sa laschar vaccinar al lieu, premiss ch'in dumber suffizient da persunas che vulan sa

laschar vaccinar è avant maun. La finala duain er las personas che appartegnan a gruppas marginalas vegnir cuntanschidas pli bain per las porscher la vaccinaziun. Fin ussa èn la Scola spezialisada superiura da pedagogia sociala, la Scola auta da teologia Cuir, la Scola auta spezialisada dal Grischun, la Scola auta da pedagogia dal Grischun, la Scola professiunala d'economia Cuir, la Scola professiunala artisanala Cuir, la Scola media svizra alpina Tavau, la Scola media evangelica Schiers (qua ha la vaccinaziun gì lieu ils 25 d'avust 2021 en il Center da vaccinaziun Schiers), la Scola d'hotellaria Passugg ed il Lyceum Alpinum Zuoz annunziads per la vaccinaziun. I vegn examinà en il cas singul, sche la vaccinaziun duai vegnir realisada en in center da vaccinaziun, en il bus da vaccinaziun u tras il team da vaccinaziun mobil. Tut tenor la dumonda stoi vegnir examinà d'integrar la media u il medi da scola. Tar la vaccinaziun dals uffants èsi central d'infurmar ils geniturs ad ura. La Scola media evangelica Schiers ha tramess il fegl d'infurmaziun e da scleriment als geniturs in'emna avant il termin da vaccinaziun. Fin ils 25 d'avust 2021 èn sa laschads vaccinar 4 383 uffants e giuvenils da la gruppa da vegliadetgna 12 fin 19 onns (12 onns: 178 = 10 %, 13 onns: 274 = 16 %, 14 onns: 262 = 15 %, 15 onns: 413 = 24 %, 16 onns: 734 = 40 %, 17 onns: 753 = 41 %, 18 onns: 830 = 43 %, 19 onns: 939 = 49 %).

Tar la dumonda 3: Actualmain vegn fatga la procedura da consultaziun areguard l'introducziun da l'obligaziun da disponer d'in certificat per locals interiurs. Sin basa da las experientschas ch'èn vegnidas fatgas durant las consultaziuns passadas da la Confederaziun stoi vegnir fatg quint che l'obligaziun da disponer d'in certificat per locals interiurs vegnia introducida en tut la Svizra. En la consultaziun s'engascha il chantun Grischun per in'obligaziun da disponer d'in certificat per tut ils secturs da la vita economica e sociala. Per proteger il sistem da sanadad en moda svelta ed efficazia e per impedir in ulteriur lockdown na dastga l'obligaziun da disponer d'in certificat betg sa restrenscher a tschertas spartas ed a tschertas bransch, per las qualas i n'è dal rest betg sclerì dal tutfatg, sch'ellas èn propi las acceleraturas da la pandemia.

Sche l'obligaziun da disponer d'in certificat na duess – cunter tuttas aspectativas – betg vegnir introducida da la Confederaziun, examinescha il chantun Grischun d'introducì l'obligaziun da disponer d'in certificat per sias instituziuns dals fatgs da sanadad. In'obligaziun da disponer d'in certificat che va pli lunsch duai eventualmain vegnir coordinada cun ils ulteriurs chantuns da la Svizra orientala.

Tar la dumonda 4: Ina incidenza bassa è en mintga cas, pia er per il turissem, meglra ch'ina auta. La Regenza è er da quest avis. La finamira è pia quella da stabilisar la situaziun fin la fin da november/fin il cumenzament da december.



En num da la Regenza

Il president:

Dr. Mario Cavigelli

Il chancelier:

Daniel Spadin